

# Ino Mekadwa A Turakki Pablo Ki Timoteo

## Ino Mapeafu Sitawa Turak

Wasin niturakkani Pablo sitawa mekadwa a tura'nga ki Timoteo, nabayinna nabalud sey Roma gafu sino angnurungnga ki Kristo. I Timoteo, agyangkepay sey Efeso a manuldu sino nakkakarampattira a nangurug sinay.

Sitawa turak, odduwa sinapiti Pablo ki Timoteo a nappatuyag sino nakamma takesi gakkuruwannange a manuldu anna mangwa sino korwana tarabafuwa netalakki Dios sikwana, massiki nu wara mappadyat sikwana anna mangontara sino tulduna.

Nepadandamma kappay ki Timoteoweno narakkatta aggangwaneno tolayira sino mauddiyera a aw e netunna si aroyuwanna naddino kunnenay. Sinapi'na kappay si amme nad medagga i Timoteo sino pattatarabbanda a awana serbina sino a'langi Dios, nu ammena lud mattalaginara manuntul anna manuldu sino kakuruwana tulduwa naggabwat ki Dios.

## Ino Bagga'na Yaw

Ino gafuneno turak 1:1-2

Ino nappasalamatani Pablo gafu ki Timoteo andino nassapitanna sino mappatuyag sino nakamma 1:3-18

Ino natalakka sindaluwi Kristo Jesus 2:1-13

Ino meannunga akwanino masserbi ki Dios 2:14-26

Ino aggangweno tolayira so mauddiyera a aw 3:1-9

Natalanggannaddi Timoteo sino naammuwanna a sapiti Dios 3:10-4:8

Ino arangngi Pablo ki Timoteo 4:9-18

Ino ambu'nenno turak 4:19-22

---

## Ino Gafuneno Turak

**1** <sup>1</sup> Ikkanaki Pablo a apostoli Kristo Jesus, gafu se antuweno urayi Dios. Dinundundaka umang mibanyag sino biyaya nekariyi Dios sikwatama nesapat ki Kristo Jesus. <sup>2</sup> Antuyawino turakku sikwam Timoteo a ibilangku si abbingkuwa iiddukangku. Allakkandaka naddi

Dios a Ama anni Kristo Jesus a Afutam ta duffunandaka nad anna passiyannakkanda naddino nakammu.

**Ino Nappasalamatani Pablo Gafu Ki Timoteo Andino  
Nassapitanna Sino Mappatuyag Sino Nakamma**

<sup>3</sup>Mappasalamatatak ki Dios gafu sikwam Timoteo. Antuweno passerbiyangku a kakunnenno nepasserbiyeno gagginafukira a awana narakkat sino nakangku. Aw anna gafi, aggadandammantaka kadda makkarak. <sup>4</sup>Maanappakungke sikwam nu madandangkuweno nakalaluwannu sin nakkatwayanta, antu gafuna, anggantaka kappaya itan takesi maangammakungke. <sup>5</sup>Madandangku kappayino gakkuruwa angngurungngu a kunna kappayino angnguruwi afuma Loida anni inama Eunice a naunta a nangurug sikwam. <sup>6</sup>Antu gafuna, ipadandangku sikwam ta gakkuruwannungke a usarannino pannakadama a neya'da i Dios sikwam sin netappakkuweno kamakku sikwama nakkararag. <sup>7</sup>Ammeka nad mattalawa musar, se ana sikwatamino Espirituwi Dios a neya'dana, e inaya Espirituwa neya'dana, ammeretam pabbalin si taladdon, nu ammeretam lud a'dan si pannakadama a masserbi ki Dios, manggam sino kasittoletamira, anna mifuwad sino baggitam.

<sup>8</sup>Kunnantu, ammekka nad maatalla mita'dag sino mapeafu ki Jesu Kristo a Afutam. Ammekka naggappay maatallan gafu sikwak a nabalud gafu sino nasserbiyangku sikwana, nu ammem lud attammanino dyata lawumanta gafu sino pibanyanta sino nalawara damag. Attammanuwera yaw, se pattuyaggandaka i Dios. <sup>9</sup>Antuweno nisalak sikwatam anna inayandetam ta ikkanetamino nadosana tolona. Ino nangwanna sinay, bakkanna gafu sino inangwatam, nu ammena lud gafu sino gakkanna annino angngikalla'nga sikwatam. Se sin ammena kepay napatatu yo lubag, dinandamman si ipaitaneno angngikalla'nga sikwatam gafu ki Kristo Jesus. <sup>10</sup>E sito ingkein, nepaitanan sikwatam inaya angngikalla'nga, se ginamwangin sito lubaggi Kristo Jesus a misalak sikwatam. Inarinanino pannakadameno katayan, e nepakaammuneno nalawara damaga massapit si damatama mabiyag si makkikiyad.

<sup>11</sup>Dinotukandaki Dios a tata a apostolna a umang mibanyag anna manuldu sinaya nalawara damag. <sup>12</sup>Antu gafuneno nadyatangku sito ingkein. Udde ammek iyatal inay, se ammukungke ino kinuruggu, e natalanggarak si aneno pannakadamana a mimut sino netala'nga sikwaka tarabafuk<sup>a</sup> makkikiyad si mada'ngeno awa puliyani Kristo.

<sup>13</sup>Nu manulduka, tuntulannungke naddino kakuruwana netulduk sikwam anna ituluyunu kappenadda mipaita sino angngurug anna

---

<sup>a</sup> 1:12 Ino tata kappaya anggamma sapitan: ...sino netalakku sikwana...

aggangamma neya'da i Kristo Jesus sikwatama nesapat sikwana. <sup>14</sup>Gafu sino pannakadamenno Espirituwi Dios a ana sikwatam, imutannuweno napatiya tulduwa netalakki Dios sikwam ta ammenan maangkakwa.

<sup>15</sup>Ammumun si kaodduwan sino manguruwira a taga-Asia e inanawandak, massikira Figelo anni Hermogenes. <sup>16</sup>Udde i Onesiforo, allakkannira naddi Afu Dios amminira a taabbalayan, se namipidyanna a nepattuyaggino nakangku. Ammerak kappay neyatal sino nabalurangu, <sup>17</sup>se wasin ginamwang sito Roma, ammena nakasinakka nintarak sikwak kiyad si nasumpalandak. <sup>18</sup>Ammungkappay si oodduweno duffunna sikwak sey Efeso. Allakkan naddi Afu Dios naso awa pangukumanna si ammina tolay.

### Ino Natalakka Sindaluwi Kristo Jesus

**2** <sup>1</sup>Ikka Timoteo a abbingku, pattuyagannu naddino angngurungngu ki Dios se odduweno duffunna sikwatam gafu sino nesapatantam ki Kristo Jesus. <sup>2</sup>Amminino diningngangngu sikwaka netulduk sino a'langino odduwa tolay, ituldummad sino matala'nguwera, takesi damara a ituldu si korwana tolay.

<sup>3</sup>Attammannuweno dyata duma'nga sikwatama mangurug ki Kristo Jesus a kakunnenno akwanino matalakka sindaluwa miyattam si dyat. <sup>4</sup>Tuntulannu kappayino akwanna sindaluwa aggadandam sino kinasindaluna a awana korwan, se antu pelang anggamma akwanino panggammanino afuna. <sup>5</sup>Dandammannu kappayino tolaya makiparesa. Awana labu'na nu ammena tuntulannino lintingngeno paresa. <sup>6</sup>Kunna kappay, ino malappatta manguma, antuweno mapalunguwa mappa sino ballena sino ganinna. <sup>7</sup>Dandammannuwerenaya nepampariggu, e duffunandaka i Afu Jesus ta maawatannuwera ammin.

<sup>8</sup>Aggadandammannu naddi Jesu Kristo a gaka i Ari David a natay e nangngangoli. Antuwenayino nalawara damaga ibanyaggu. <sup>9</sup>Gafu sino nibanyangu sinaya nalawara damag, madyatanak sito ingkein anna nabaluraka kunnange minalliwat. Udde ino sapiti Dios, ammena mabalud. <sup>10</sup>Antuweno attammangu amminino dyat para sino pallawaranino tolayira a piniliyi Dios ta mesalakanira anna mesapatira sino kalalawarana biyag sey langita awana kiyanna. <sup>11</sup>Gakkurug yawa sassapit,

“Nu nesapatetam ki Kristo sino natayanna, mesapatetangkappena sikwana a mabiyag si makkikiyad. <sup>12</sup>Nu matalanggaretama miyattam si dyat, makiturayetamma sikwana sino patturayanna. Udde nu ammayantamino nangammuwantam sikwana, ammayandetam pena. <sup>13</sup>Massiki nu ammetam matalak, matalak kappay, se ammena dama a amme akwanino sinapi'na.”

### Ino Meannunga Akwanino Masserbi Ki Dios

<sup>14</sup>Kanayunnu nadda ipadandammirenay sino manguruwira sitan, e tunannuwera sino a'langi Dios ta ammera nad massasarombat

mappeafu si sapippelang, se awana serbina, nu ammena lud darallannino angnguruwino maningngaggira. <sup>15</sup>Iyekwamungke naddino damama mangwa sino panggammani Dios, a kunnangkeno mattarabafuwa ammena iyatallino akwanna, e nalawarino annulluna sino kakuruwana sapiti Dios. <sup>16</sup>Ammeka nad medagga sino pattatarabbanda a awana serbina sino angngita i Dios, se ino mangwera si kunnenoy, masesenuta umaroyuweno nakanda ki Dios. <sup>17</sup>Ino sapitanda, kakunnenoy gurira naladda a mannanep a manaral sino baggina tolay. Ino adwera a manuldu si kunnenoy, da Himeneo anni Fileto. <sup>18</sup>Aroyuweran sino kakuruwan e kungkulandeno angnguruwino korwanira, se ino tuldura, nasinduwennino nangngangoliyanino natayira. <sup>19</sup>Udde massiki nu kunnenayino sapitanda, ammena maangkakweno kakuruwana sapiti Dios, se kunnangke natuyagga fundasiyona ammena maguyad, a aneno neturak sinaya massapit si, “Ammuwi Afu Dios nu inyeno tolenera,” anna sapitanna kappay si, “Nu inyeno massapit si mangurug ki Afu Jesus, ibbattanna nad amminino narakkat.”

<sup>20</sup>Sino dokalla baleneno ba'ngang, ammena nakkakarunneno usaranda. Aneno duyuwa bulawan anna karasiya a usaranda nu wara kaatallanda, e ana kappayino duyuwa kayu anna nadweng a usaranda kadda aw. <sup>21</sup>Ino tolaya umaroyu si ammina narakkat, mekunna sino bulawana duyug. Se awana narakkat sikwana, e meannunga usarannino Afuna, se nadadana masserbi si massiki sanna a nalawara akwan.

<sup>22</sup>Antu gafuna, talekkurannu naddino narakkatta panggammanino bafuwanakira, ta iyekwamungke naddino damama mangwa sino nalawad annino mappatuyag sino angngurungngu. Iyekwangkappenaddino damama manggam sino bafulunnuwera ta mekunnenoy nakammu sino ammina tolaya marang si duffun ki Afu Jesus a natalanggadda mangurug sikwana. <sup>23</sup>Aroyuwannu naggappayino pattatarabbanino tolayira a kurangino ammura a awana serbina, se ammu si ino pelang pattupakkannenay ino akkakwa. <sup>24</sup>Se ino masserbi ki Afu Jesus, ammena nad makipakwa, nu ammena lud nannakam si ammina tolay. Nalaing kappenadda manuldu anna naanusa miyattam si dyat. <sup>25</sup>Nannakammadda manuldu sino makikontarera sikwana, tantaro nu paddandammannira i Dios ta ibobolireno liwa'da e maammuwandeno kakuruwana tuldu. <sup>26</sup>Se nu kunnenoy, minnanakammira anna meli'wera sino pannakadama i Satanas a nano'ma sikwara ta patutannera a mangwa sino panggammana.

### Ino Aggangweno Tolayira So Mauddiyera A Aw

**3** <sup>1</sup>Dandammannu nad yawa sapitangku. Naso mauddiyera a aw, oodduweno kadidyatan sito lubag. <sup>2</sup>Se ino aggangwaneno tolayira, ino baggira pelangino dandammanda, naingapira si pirak,

massangeletira, anna iyantoreno baggira. Ilopalope'deno bafulundera, ammera kuruwannino mapparana'dera, awana ammura a mappasalamat, anna ammerangke dandammanni Dios. <sup>3</sup>Massiki ino abbidera, ammera kappay aanggamman. Nu wara makaliwat sikwara, ammerangke pakoman. Paraparallandeno bafulundera, ammera makafuwad sino baggira, anna awana nakanda. Kababannaddeno ammina nalawad. <sup>4</sup>Ammerangke matalak, foforme pelangino akwanda a ammera dandammannino tupa'nga, anna massangkatolayira. Ino pelang panggammandeno akwanda a ammera dandammannino panggammani Dios. <sup>5</sup>Massalasangkunira a maddayaw ki Dios, udde ammera netulukino baggira sino pannakadamana ta mapataliyanino narakkatta aggangwara. Aroyuwannuwerenaya tolay. <sup>6</sup>Ino korwan sikwara, mammalafalayira a makakkiyayam sino tolayira takesi balabaliyandeno bafabbayira a nakafuyino nakanda ta tuntulandeno tuldura. Inayira a bafabbay, malowino nakanda gafu sino odduwa liwa'da, e tagakurukuruwira gafu sino panggammanino baggira. <sup>7</sup>Kanayunira a maddingngag si bawuwa tuldu, udde ammera makaawat sino kakuruwana tuldu. <sup>8</sup>Ino tolayira a mamalabali sinayira a bafabbay, passiya narakkattino nakanda, e awana serbina ki Diosino salasangkuna angngurudda. Kontarandeno kakuruwana tuldu a kakunnara Janes anni Jambres a nakkontara ki Moises si'in. <sup>9</sup>Udde ammena mabayino pamalabaliyanda sino tolayira, se maammuwandeno kinalokora a kunna kappayino nakwa sikwara Janes anni Jambres.

### **Natalanggannaddi Timoteo Sino Naammuwanna A Sapiti Dios**

<sup>10</sup>Udde ikka Timoteo, naammuwannuweno netulduk, ino aggangwak, andino gakkagguwa mangwa sino panggammani Dios. Naammuwannungkappayino kakuruwanneno angnguruggu, ino anusku, ino agganggangku si kasittolek, andino angngiyattangu si massiki sanna a makwa sikwak. <sup>11</sup>Ammungkappayino angngilopalope'da sikwak annino nappelalota dyakku a kunnangke ino nakwa sikwak sey Antiokia, Iconio, anda sey Listra. Udde massiki kunnenoy, nesala'daki Afu Jesus sino ammin inaya dyakku. <sup>12</sup>Bakkanna ikkanappelangino madyatan, nu ammena lud amminira a manggamma mangwa sino panggammani Dios gafu sino nesapatanda ki Kristo Jesus. <sup>13</sup>Udde ino narakkattira a tolay annino mamalabaliyera, umoodduweno kinarakka'da. Mamalabaliyera sino bafulundera e mabalabaliyanira kappay.

<sup>14</sup>Udde ikka, natalanggagga nad sino tulduwa naammuwannu. Ammum si gakkurug, se ammunungke si matalakkino nanulduwera sikwam. <sup>15</sup>Se kiyad sin kabbingngu, naammuwannunnino neturakka sapiti Dios a antuweno pangammuwanna tolay sino kesalakan gafu sino angngurungnga ki Kristo Jesus. <sup>16</sup>Ammina nepeturakki Dios, naggabwat

ammin sikwana, e napatiyino kausaranna, se ipakaammuna sikwatamino kakuruwan, ibuyaretam nu wara liwattam, pallawaranneno narakkatta aggangwatam, anna tulduwandetama mangwa sino panggammami Dios, <sup>17</sup>takesi awaningke a pakkurangantama masserbi ki Dios, nu ammetam lud nadadana mangwa sino ammina nalawara paangwana.

**4** <sup>1</sup>Antuyawino itungku sikwam sino a'langi Dios anni Kristo Jesus a mangukumma si ammina tolay, massiki ino aggabiyayira onnu ino natayiran. Gafu se muli sitawi Kristo Jesus a matturay, itungku sikwam si <sup>2</sup>kanayungka nadda nadadana manuldu sino sapiti Dios. Ituldum lud sino tolayira nu angganda a dingngaggan onnu ammera. Ipakaammum sikwara nu wara liwa'da anna ibuyam ta ibobolira. Pattuyagannuveno nakanda a mangwa si nalawad. Nannakangka nadda mangwa si kunnenay sino panulduwannu sikwara. <sup>3</sup>Se mada'nganeno awa amme anggammimo tolayira a dingngaggannino kakuruwana tuldu. Angganda pelanga manuntul sino narakkatta ana sino nakanda, antu gafuna, mayira si odduwa manuldu sikwara sino angganda a dingngaggan. <sup>4</sup>Aanggandangke a dingngaggannino paraparatu pelanga sapit, e bangngaggandeno kakuruwana tuldu. <sup>5</sup>Udde sikwam, napalangka nad sino ammina akwannu. Iyattammu nad ammina dyat a duma'nga sikwam. Ituluynu naggappaya mibanyag sino nalawara damag. Akwannu amminino tarabafuwa netalakki Dios sikwam.

<sup>6</sup>Udde ikkanak, meyampariyino biyaggu sino isibudda nu wara iwa'la'da ki Dios, se ara'niyennino anawangku sito lubag. <sup>7</sup>Sino passerbiyangku ki Dios, neyekwak amminino damaka kunnangke makiparesa, e sitoaya, dina'ngakunnino pakkiyananino paresa. Natalanggaraka nanuntul sino kinuruddam anna inimukku ta ammena maangkakwa. <sup>8</sup>Antu gafuna, aneno nedadana labukku sey langit a iya'daneno naggaddangnga ukum a i Afu Jesus sikwak so awa pangukumanna si ammina tolay gafu sino nangwangku sino panggammanna. Bakkanna ikkanappelangino labutanna, nu ammena lud amminira a manggamma mita sikwana so puliyanna.

### Ino Aranggi Pablo Ki Timoteo

<sup>9</sup>Nu damana, malangka nadda umang sitaw, <sup>10</sup>se i Demas, inanawandak e inang sey Tesalonica gafu se antu pelang aggadandammanneno pallawaranna sito lubag. I Cresente, inang sey Galacia, e i Tito, inampay sey Dalmacia. <sup>11</sup>I Lucas pelangino bulungku sitaw. Nu umangka sitaw, sippalannuwi Marcos, se damana a manuffun sikwak sino tarabafuk. <sup>12</sup>Dinundungkuwi Tikico sey Efeso. <sup>13</sup>Nu umangka sitaw, sippalannuveno tafalkuwa nabattangku ki Carpo sey Troas. Appannu kappayino leburukira, kumarallino nalukulukutira a turak.

<sup>14</sup>I Alejandro a gumapanday, odduweno narakkatta inangwana sikwak, udde i Diosino makammuwa mibalat si meannung sino inangwana.

<sup>15</sup>Palanannu, se ginakkurungnganke a kinontareno tuldutam.

<sup>16</sup>Sin pittara a nimbistigar sikwak, awaningke a bulungkuwa nana'dag sikwak, se inanawandak. Udde pakomanira naddi Dios sinaya inangwara.

<sup>17</sup>Udde massiki nu kunnenayino inangwara, ammerak nepurayi Afu Jesus, nu ammena lud nepattuyaggino nakangku takesi damaka sapitannino kakuruwana tuldu ta dingnganggan amminino bakkannira a Judyu sinay. Nesala'ngak kappay sino kattalatalawa dyat a meyamparig sino wangi'na layon. <sup>18</sup>E amruk si isala'ngaki Afu Jesus sino ammina narakkat kiyad si appandak sino patturayanna sey langit. Madandayonad si makkikiyad. Amen.

### Ino Ambu'nenno Turak

<sup>19</sup>Sapitannu sikwara Priscila anni Akila si aggadandammanguwera, mampay sikwara Onesiforo a taabbalay. <sup>20</sup>Nabattangi Erasto sey Corinto, e i Trofimo, binatangku sey Mileto se malowan. <sup>21</sup>Malangka nadda umang sitaw liyena irid.

Da Eubulo, Pudente, Lino, anni Claudia, anna amminino korwanira a manguruwa ana sitaw, aggadandammandaka pay.

<sup>22</sup>Kanayun nadda mebumbuluni Afu Jesus sikwam, e allakkandakayu nad ammin.